

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-00732-2018
Broj akta: 01EN-001
Gračanica, 5.3.2018.. godine

Z A P I S N I K
SA 15. SJEDNICE OPĆINSKOG VIJEĆA GRAČANICA

Održane dana 30. 01. 2018. godine u sali za sjednice nove zgrade Općine Gračanica sa početkom u 11,00 sati.

Početu sjednice je prisustvovalo 27 članova Općinskog vijeća.

Odsutni su bili: Pjanić Safet., Trepanić Mirela i Aljić Adem.

Sjednicu je otvorio i istom predsjedavao Nihad Krajinović, Predsjedavajući Općinskog vijeća Gračanica, zajedno sa zamjenikom Devedžić Almedinom i sekretarom Dženanom Tukulj.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Vijeća sjednici su prisustvovali i Općinski načelnik, Općinski pravobranilac, šefovi službi za upravu, izvjestioci po pojedinim tačkama dnevnog reda, predsjednica Komisije za etički kodeks, predstavnici Organizacija boračkih populacija, te predstavnici sredstava informisanja.

Zapisnik sa 14. Sjednice Općinskog vijeća Gračanica usvojen je jednoglasno sa 27 glasova "ZA".

Predsjedavajući Vijeća je elaborirao prispjele odgovore na vijećnička pitanja i inicijative sa ranije sjednice.

Zatim je dodao:

“U međuvremenu je stigao i odgovor Kolegija Općinskog vijeća na inicijativu Avdić Arnesa. Odgovor Kolegija Vijeća je da je razmatrana inicijativa vijećnika Arnesa Avdića i donesen je slijedeći stav:

U duhu Zakona o državnoj himni Bosne i Hercegovine Kolegij Općinskog vijeća smatra da se državna himna treba intonirati na svečanim sjednicama Općinskog vijeća i drugim prigodnim događajima u skladu sa Zakonom.

Intoniranje himne nije predviđeno Poslovníkom o radu Općinskog vijeća, te će ova Inicijativa biti razmatrana u okviru izmjena i dopuna Poslovníka o radu.

Avdić Arnes se javio za komentar na odgovor Kolegija Vijeća:

“Ja se zahvaljujem Kolegiju Općinskog vijeća na odgovoru i u razgovoru sa opštinskim službama, dobio sam usmeni odgovor da postoji tehnička opremljenost da se državna himna intonira prije početka sjednice. Evo ja tražim od Općinskog vijeća da se izjasni o ovoj inicijativi. Evo da objasnim. Znam da nema po Poslovniku da se izjašnjava o inicijativama, ali ne mogu se sad tačno sjetiti bilo je slučajeva da se Vijeće izjašnjavalo o jednoj inicijativi pa tako i ja tražim da se pojedinačno Vijeće izjasni o inicijativi. A u Poslovniku ne piše da ne mogu tražiti izjašnjavanje. Tražim izjašnjavanje pojedinačno svakog vijećnika o inicijativi za intoniranje državne himne prije početka sjednice Općinskog vijeća”.

Hasan Puškar:

“Ja imam jednu molbu. Je li svaku sjednicu moramo zakomplikovati bez veze. Nismo ni krenuli, a evo problema. Inicijativa je bila prošli put i dobio si odgovor, koliko ja znam. Znači mi se sad možemo samo izjašnjavati o nekom odgovoru. A da bi se mi izjašnjavali treba biti tačka dnevnog reda ili materijal ili nešto. Sad su vijećnička pitanja i vijećničke inicijative. Ja mislim da se ne izjašnjava o inicijativama, a pogotovo što si dobio odgovor i možeš biti zadovoljan ili nezadovoljan odgovorom. I to je to, a sad postavljamo nova pitanja i nove inicijative. Ili da ti sad ponovo postaviš inicijativu, a onda da mi napravimo pauzu i o tome raspravimo. Trenutno si ti samo nezadovoljan odgovorom, a normalno ko će biti protiv da se državna himna intonira itd. A da bi se mi pojedinačno izjašnjavali, prvo se mora izraziti sumnja na glasanje i kad se izrazi sumnja u rezultate glasanja u skladu sa Poslovnikom ide se na poimenično izjašnjavanje. Molim Vas da ne komplikujemo i da krenemo sa sjednicom”.

Nihad Krajinović, je naglasio:

“Ja sam pročitao i da je Kolegij zauzeo stav da intoniranje himne nije predviđeno Poslovnikom o radu Vijeća, a Vaša inicijativa će se razmatrati u okviru izmjena i dopuna Poslovnika o radu Vijeća koji slijedi. To je to”.

Prešlo se na kandidovanje novih pitanja i inicijativa a kandidovali su ih slijedeći vijećnici:

Alihodžić Nermina:

“Ja za današnju sjednicu imam jednu inicijativu i ona glasi:

Povećanje broja radnih dana matičnog ureda u MZ Donja Orahovica.

Obrazloženje:

Mjesna zajednica Donja Orahovica kao druga po veličini mjesna zajednica na području naše općine iskazuje potrebu odnosno njeni građani traže da Načelnik Općine, nadležne općinske službe razmotre, donesu odluku o povećanju broja radnih dana matičnog ureda. Matični ured u Mjesnoj zajednici Donja Orahovica za njene građane je otvoren odnosno radi dva dana u sedmici. Građani kao krajnji korisnici usluga iskazuju nezadovoljstvo, smatrajući da Donja Orahovica po svojoj veličini, brojnosti njenih građana zaslužuje da navede usluge matičara njenim građanima budu dostupne pet dana u sedmici.

Uvažavajući građane mjesne zajednice iz koje dolazim, njihove potrebe i zahtjeve upućujem navedenu inicijativu, te tražim od načelnika općine, nadležnih općinskih službi da vodeći se istim principom prihvatite navedenu inicijativu”.

Avdić Arnes:

“Za danas sam pripremio jednu inicijativu, a ona glasi:

Vijećnička inicijativa za popravak asfaltiranog dijela puta u MZ Gračanica.

Objašnjenje:

Poštovani,

Upućujem inicijativu nadležnim službama Opštine Gračanica za popravak dijela puta u MZ Gračanica u Ulici Pekarski prolaz. S obzirom na ozbiljnost situacije i ugroženosti u kojoj se nalazi građani a pogotovo najmlađi molim Opštinske službe da u što kraćem vremenskom periodu izvrše popravak u navedenoj ulici. Navedena popravka ne zahtijeva velika finansijska sredstva, a ne sumnjam da će Opštinske službe u što kraćem roku otkloniti ovaj problem. U prilogu Vam dostavljam i slike kako bi se uvjerali tačnije o čemu je riječ”.

Edin Ibrišević:

“Ja za današnju sjednicu imam jednu inicijativu:

Inicijativu upućujem Općinskom načelniku da izvrši nabavku mobilne aplikacije koja će omogućiti da građani putem svojih mobilnih telefona mogu odmah sa lica mjesta sa fotografijom ili videom prijaviti nepravilnosti općinskoj komunalnoj inspekciji i redarima.

Obrazloženje:

Nabavka jedne ovakve mobilne aplikacije omogućila bi kvalitetniji rad komunalnih službi što bi za posljedicu imalo čistu, uređenu i ekološki prihvatljivu životnu sredinu. Napominjem da izrada ovakve aplikacije ne iziskuje veće finansijske troškove i da već ima općina koje su uvele ovakav način saradnje između lokalne zajednice i građana. Na ovaj način približili bi se još realizaciji MEG Projekta. A prema već preuzetim podacima opštine koje su ovo već uvele nisu čak ni platile ovu aplikaciju. Njihovi programeri su izradili, a vjerujem da na prostoru Općine Gračanica ima dovoljno sposobnih ljudi koji bi ovo uradili i besplatno. Ovakva aplikacija bi doprinijela da zaustavimo sve one koji na nelegalnom načinu prije svega odlažu otpad i zagađuju našu sredinu”.

Alen Ibrišević:

“Za današnju sjednicu ja imam jedno vijećničko pitanje:

Pitanje upućujem Općinskom načelniku Nusretu Heliću, dokle se došlo sa izradom nove web stranice Općine Gračanica?

Obrazloženje:

Općina Gračanica je još prošle godine krenula sa izradom nove web stranice. U pristiglim odgovorima na nekoliko vijećničkih inicijativa i pitanja, nevedeno je da će nova web stranica općine sadržavati brojne dokumente kao što su zapisnici sa sjednica, registar vijećničkih inicijativa i pitanja, materijale za sjednice Općinskog vijeća i slično, te da će biti daleko uređenija i pristupačnija za korištenje. Takođe je obećao da će nova stranica biti izrađena u toku 2017., pa me interesuje dokle se došlo sa izradom stranice i dali će ista biti izrađena u skorije vrijeme?”.

Hasić Ibrahim:

“Ja imam jednu inicijativu ali ona se ustvari pojavljuje treći puta. Upućujem Općinskom načelniku i nadležnoj službi odnosno obnavljam inicijativu. Da isti pristupe iznalaženju mogućnosti o imenovanju ulice, parka ili staze od srednjoškolskog centra do regionalnog puta kod BKC-a po imenu Srđana Aleksića. Nedavna tema dana je također tražila i prihvatila inicijativu da se jedno od tri mjesta nazove po imenu Srđana Aleksića, što znači da je javnost prihvatila jednoglasno. Bez obrazloženja na prvoj inicijativi postoji isto.

Molim uvaženo načelnika, nadležne službe da imenuju komisiju za iznalaženje odgovarajuće lokacije za isto. U protivnom nema potrebe prihvatiti inicijativu ili pitanja ukoliko se ista ne realizuju”.

Bajrić Vahid:

“Ja imam dvije inicijative i to:

Izgradnja mini hidrocentrale uređenje korita i obale rijeke Spreče uklonjene su velike deponije smeća - spriječeno je dalje izlivanje rijeke u Donjoj Orahovici što je za pohvalu.

Domaćinstva koja su priključena na kanal mrežu – Kamenica - Spreča smatraju da bi izlazni dio kanalizacije trebalo dograditi kako nebi došlo zatrpavanja kanalizacije gdje bi došlo do izlivanja otpadnih voda. Investitor izvođač je ukazao na taj problem i spreman je na razgovor da se taj problem riješi.

Druga inicijativa glasi:

Osnovna škola Donja Orahovica u Donjoj Orahovici - Rijeka. Vijeće roditelja učenika, nastavnici, učitelji i ja kao vijećnik podnosim inicijativu Ministarstvu TK i Općinskom načelniku. Uslovi učenika, nastavnika za održavanje nastave u školi su jako loši. Trenutno se vodi akcija oko prikupljanja novčanih i drugih sredstava za izmjenu dotrajale stolarije i uređenje unutarnjih zidova. Smatram da prikupljena sredstva od građana nisu dovoljna da se ovaj problem riješi”.

Ahmet Šakušić:

“Ja imam jedno vijećničko pitanje.

Upućujem pitanje nadležnim općinskim službama, a odnosi se na dobijanje informacije o davanju saglasnosti, na području općine Gračanica, kabl operateru “Telemach” d.o.o. na korištenje postojeće infrastrukture, vrši li se plaćanje naknade i na koji način?

Obrazloženje:

Građani općine Gračanica žele znati da li firma “Telemach” d.o.o. na području općine Gračanica posjeduje upotrebne dozvole za korištenje postojeće infrastrukture, plaća li naknadu za korištenje iste ili se vrši uzurpacija stubova elektrodistributivne mreže, javne rasvjete, kao i prokopa javnih i privatnih površina.

Mirsad Čamdžić:

„Moja vijećnička inicijativa broj jedan je:

Da se postavi saobraćajni znak na mostu kod Šumarije.

Na mostu iz pravca Skvera, još davnih dana je prilikom saobraćajne nezgode otkinut saobraćajni znak sa ostrva. Do dan danas znak nije postavljen, tako da vozače dovodimo u zabunu i zabludu. Konkretno, prema postojećoj saobraćajnoj situaciji, vozilo koje ide regionalnom cestom, od Konzuma prema autobuskoj stanici - mora stati i propustiti po pravilu desne strane vozilo koje ide s mosta. Da ne nabrajam dalje saobraćajne nelogičnosti koje nastaju zbog nepostojanja ovog znaka.

Inicijativa broj dva glasi:

Da se postave svjetlosni treptaći na regionalnom putu R 460 na pješačkom prelazu iz pravca Općine/MSŠ prema fiskalturnoj sali u Gračanici. Inicijativa ide za Direkciju za ceste TK.

Jedan od najfrekventnijih prelaza na ovom putu gdje hiljade učenika svakodnevno prelaze na nastavu tjelesnog odgoja. Prema saznanjima iz P.U. svake godine se na ovom prelazu dese dvije - tri saobraćajne nezgode, na sreću sa lakšim posljedicama. Na ovom pravcu vozači razvijaju veću brzinu i bilo bi neophodno izvršiti dodatno obezbjeđenje.

I još jedno pitanje:

Ja nisam imao ideju kome da ga naslovim, a muči me dugo pa sam najlakše natovario na načelnika.

Ono glasi: Koliko osoba je u posljednje dvije godine napustilo općinu Gračanica?

Obrazloženje:

U posljednje vrijeme sve su učestalije priče o odlasku mladih u potrazi za poslom. Za razliku od nekadašnjih migracija sa ovih prostora, u ovom slučaju odlaze i čitave porodice i kupuju kartu u jednom pravcu. Nemamo apsolutno nikakvih saznanja o broju, mada baveći se novinarskim poslom na primjer saznanjem da skoro mjesečno po jedna porodica iz Lukavice odlazi u inostranstvo kao primjer. Koliko naših ljudi vozi kamione po Evropskoj Uniji, njeguje bolesnike po Njemačkoj, vari, zida po evropskim predgrađima...ni približno ne znam broj.

S obzirom da je ovaj broj strateški vrlo važan, pitam načelnika kako doći do njega i po mogućnosti uključiti dodatne resurse kako bi smo mogli približno dobiti ovaj broj. Naravno, ne očekujem ja ovdje ni potpuni odgovor, niti je lako ovo naći, ali da bar pokušamo naći neki broj o broju mladih i inače osoba koje su otišle u inostranstvo“.

Šehić Edin:

„Ja imam jednu vijećničku inicijativu ali prije same inicijative, kratak osvrt na odgovor na predhodno pitanje vezano za parking prostor preko puta Policijske uprave. Dakle, dobio sam odgovor da je to javno parkiralište svrstano u zonu dva gdje se ne vrši naplata parkinga i da se javno parkiralište označava signalizacijom. Nadam se da će se uskoro to parkiralište označiti signalizacijom kao i oni za koje sam ja tražio, a ovo o zabrani parkiranja to ćemo se pozabaviti sa policijom da oni rade svoj posao.

Vijećničku inicijativu upućujem svim službama i Općinskom načelniku:

Vijećnička inicijativa za sazivanje tematske sjednice Općinskog vijeća Gračanica u vezi rasprave o stanju u firmama i nekadašnjim gračaničkim gigantima (Fortuna, Olimp, Fering, Grafopak, itd.).

Obrazloženje:

Svjesni položaja obespravljenih radnika nekadašnjih gračaničkih giganta: Fortune, Feringa, Olimpa, Grafopaka, itd., a i trenutnog položaja nekolicine obespravljenih građana (bivših uposlenika Fortune koji danonoćno u nehumanim uslovima traže svoja prava, a slične stvari možemo očekivati i od ostalih obespravljenih radnika nekadašnjih gračaničkih giganta, u najmanju ruku nas predstavnika tih građana. Moralno obavezuje da održimo navedenu tematsku sjednicu.

Ja znam da nije Općina Gračanica i Općinsko vijeće nadležno za rješavanje tih problema, ali mislim da je moralno da raspravljamo i da vidimo kako pomoći tim našim građanima, onoliko koliko možemo, obzirom da imamo i uspješne privredne, a nadam se i dosta humanih ljudi u Općini“.

Džebo Senahid:

„Ja za danas imam samo jednu vijećničku inicijativu, a ona glasi:

Uvođenje dežurnog telefona za prijave građana komunalnim inspektorima.

Obrazloženje:

Sve učestaliji slučajevi ispuštanja komunalnih otpadnih voda iz septičkih jama u kasne popodnevne sate i u dane vikenda u otvorene kanale duž javnog puta sa izuzetnom frekvencijom građana i đaka.

Više puta građani su podnosili i pisali peticije, te je komunalni inspektor izlazio ali konačnog rješenja nema.

Stoga tražimo uvođenje dežurnog telefona kako bi se interventno djelovalo i spriječilo daljnje onečišćenje. Inicijativa je upućena načelniku i nadležnoj Općinskoj službi na razmatranje i ukoliko se nađe prostor, mogli bi nešto poduzeti u vezi s ovim“.

Demir Milkić:

„Ja imam dva pitanja:

Mene zanima u čijoj je nadležnosti i postoji li mogućnost izgradnje natkrivenih autobuskih stajališta na par lokacija u gradu. Zamoljen sam od strane građana da upitam i predložim ovo kao inicijativu koja bi svakako bila od koristi građanima kao i našoj Općini jer ove stvari spadaju u urbanu opremu. Svakako da je ovo potrebno na mjestima: kod Bolnice, preko puta Fortune i pod lipama preko puta Žito kombinata gdje su najveće gužve za čekanje autobusa.

Vijećničko pitanje/inicijativa:

Postoji li mogućnost za instaliranje kontejnera za odlaganje odjeće i obuće u gradu. Zamolio bi nadležne službe da u suradnji sa komunalnim preduzećem i humanitarnim organizacijama ispituju mogućnost realizacije.

Građani su me zamolili da pokušamo obezbijediti nekoliko takozvanih humanitarnih kontejnera, gdje će odlagati odjeću i obuću, a kasnije bi je humanitarne organizacije distribuirale onima kojima je ona potrebna. Ja znam da ima jedan kontejner kod šarene džamije. Kontaktirao sam EMMAUS i rekli su mi da je taj kontejner uvijek pretrpan i da građani odlažu čistu i popeglanu odjeću, a da ovo postavimo na nekim drugim lokacijama.

Gadžić Rahim:

„Ja imam jednu vijećničku inicijativu, a ona glasi za sanaciju divlje deponije. Tražim da komunalni redari izađu na teren i ustanove stanje divlje deponije i predlože mjere za njenu sanaciju. Divlja deponija se nalazi pored puta Trnovci-Prijeko Brdo. Evo duže vrijeme dovlači se otpad na jedno područje, a to je na prelazu iz Trnovaca prema Prijekom Brdu, a mi kažemo u Gornjoj Rijeci našoj. Znači pored rijeke je velika divlja deponija, zbog čega tražim da što je moguće prije da izađu komunalni redari i predlože mjere sanacije te divlje deponije“.

Almedin Devedžić:

„Ja imam dvije inicijative.

Jedna je upućena Direkciji za ceste Tuzlanskog kantona:

Zahtjev za hitnu regulaciju površinskih voda i popravku odvodnih kanala regionalnoj cesti Klokotnica - Lukavica na potezu Ograđenica (raskrsnica) – Lukavica Rijeka.

Obrazloženje:

Za vrijeme padavina na asfaltnom kolovozu stvara se velika količina vode koja ne ponire kroz otvore (šahte). Otvori su začepljeni otpadnim materijalom i muljem, a na mjestima nema metalnih poklopaca. To otežava saobraćaj i predstavlja opasnost za učesnike u saobraćaju. U naselju Subašići u MZ Lukavica, koje se graniči sa MZ Lukavica Rijeka, začepljeni su svi otvori koji primaju površinske vode tako da ista zadržava pri svakoj manjoj kiši na bankini kolovoza i prelijeva se na donju stranu. To predstavlja opasnost za sve učesnike u saobraćaju posebno za okolne kuće, jer se stvara realna pretpostavka da budu poplavljene. Pozivam nadležne da hitno reaguju kako bi se opasnosti na koje sam ukazao, izbjegle.

Druga je upućena Policijskoj upravi Gračanica:

„Zahtjev za pojačano policijsko prisustvo u MZ Lukavica u naselju Ograđenica i Kruščik.

Obrazloženje:

U zadnjih mjesec dana u gore pomenutim naseljima primjećeno je narušavanje javnog mira u poslije ponoćnim satima od strane nepoznatog ili nepoznatih lica. Naime, pomenuti dolaze u privatne avlije i u kasne sate uznemiravaju građane. Uznemiravanja sadrže hlupanje na vrata i prozore što izaziva strah kod građana. Lukavica je pogodno mjesto za ovakva i slična dešavanja, obzirom da se nalazi tik uz entitetsku granicu i mogućnost lakog bijega iz entiteta u entitet. Građani pozdravljaju zadnju aktivnost policijskih službenika policijskih stanica Gračanica i Doboj Istok gdje su spriječene moguće terorističke ili razbojničke aktivnosti u mjesnim zajednicama Lukavica Rijeka i Lukavica. U svijetlu toga, pozivam nadležne u PU Gračanica da pojačaju policijsko prisustvo u cijelom pomenutom rejonu

posebno u naseljima Ograđenica i Krušćik u periodu od ponoći pa do ranih jutarnjih sati, kako bi se građani osjećali sigurno u svojim domovima.

Nakon inicijativa Almedin Devedžić je iznio stavove Komisije za obrazovanje vezano za nacрте Zakona o izmjenama i dopunama Zakona o predškolskom odgoju i obrazovanju TK i nacрта Zakona o izmjenama i dopunama Zakona o sportu TK koji su bili na javnoj raspravi:

„Evo obzirom da su nacрти trebali biti na dnevnom redu Općinskog vijeća, ali kako su rokovi bili kratki Kolegij Općinskog vijeća je dao da Komisija za obrazovanje razmotri nacрте te predloži i uputi primjedbe, sugestije i mišljenja na iste.

Prvo idu *Primjedbe, sugestije i mišljenja na Nacrt Zakona o izmjenama i dopunama Zakona o predškolskom odgoju i obrazovanju Tuzlanskog kantona – javna rasprava*

Na osnovu Zaključka Kolegija Općinskog vijeća Komisija za obrazovanje, kulturu, sport, mlade i odnose sa vjerskim zajednicama Općinskog vijeća Gračanica na sjednici održanoj 25.01.2018. godine razmatrala je Nacrt Zakona o izmjenama i dopunama Zakona o predškolskom odgoju i obrazovanju Tuzlanskog kantona i donijela sljedeće zaključke :

- **U članu 11 Nacrta Zakona riječi „četverogodišnjem trajanju koji se vrednuje s najmanje 240 ECTS“ zamjenjuje se riječima: „najmanje trogodišnjem trajanju koji se vrednuje s najmanje 180 ECTS“**
Obrazloženje: Predloženim rješenjem iz Nacrta u neravnopravan položaj bi bila stavljena lica koja su stekla zvanje po istom ciklusu obrazovanja.
- **U članu 22 Nacrta Zakona u stavu 1. riječi „opreme“ se zamjenjuju s riječima „nastavna sredstva, učila, oprema i investiciona ulaganja(rekonstrukcije, izgradnja i dogradnja)“.**

Komisija je takođe zauzela stav da se odbija svaka mogućnost daljnjeg dodavanju nove kategorije - profila stručnjaka, a prema prijedlozima nekih općina/gradova tzv „**saradnika odgajatelja**“ a kojim bi kao takvi mogli biti ugrađeni i profesori razredne nastave ili drugi nastavnički fakulteti. Komisija smatra da za takvim uvođenjem novih kategorija nema potrebe, jer ne postoji deficitarnost kadrova predškolskog odgoja na području čitavog Kantona, već samo na području pojedinih općina/gradova, i ovom izmjenom bi bilo omogućeno zapošljavanje druge struke umjesto onih koji su se školovali upravo za predškolski odgoj i obrazovanje.

Zatim, *Primjedbe, sugestije i mišljenja na Nacrt Zakona o izmjenama i dopunama Zakona o sportu Tuzlanskog kantona – javna rasprava*

Na osnovu Zaključka Kolegija Općinskog vijeća Komisija za obrazovanje, kulturu, sport, mlade i odnose sa vjerskim zajednicama Općinskog vijeća Gračanica na sjednici održanoj 25.01.2018. godine razmatrala je Nacrt Zakona o izmjenama i dopunama Zakona o sportu Tuzlanskog kantona i donijela sljedeće zaključke :

- Nacrtom Zakona trebali bi biti obuhvaćene i izmjene i dopune članova 10. i 11. Zakona o sportu gdje se govori o Godišnjem programu razvoja sporta kantona i općina i to u smislu da Zakon jasno definiše šta se finansira iz budžeta. U tom smislu Komisija predlaže da se finansiraju/sufinansiraju OSNOVNI PROGRAMI; POSEBNI I DOPUNSKI PROGRAMI. Pod OSNOVNIM PROGRAMOM podrazumijeva se sufinansiranje troškova prijevoza i ishrane sportista za redovna sportska takmičenja, troškovi organizacije takmičenja, sudija i delegata, formiranje i

korištenje sportskih objekata, ljekarskih pregleda i nabavka sportske opreme. Pod POSEBNIM PROGRAMOM podrazumijevaju se finansiranje/ sufinansiranje različitih škola sporta, kao nešto što je značajno za razvoj sporta ali nisu u sastavu sportskih saveza i ne mogu se trenutno ni finansirati, zatim ekstremni sportovi. Raspodjela sredstava u okviru DOPUNUSKOG PROGRAMA obuhvata adaptaciju i sanaciju i izgradnje sportskih objekata, organizacija sportskih takmičenja od interesa za kanton ili za općinu (turniri ili takmičenja od kantonalnog ili lokalnog značaja) i organizacija sportskih takmičenja organizovanih na nivou pojedinih sportskih saveza.

- Predlaže se i da se izmjenama i dopunama Zakona obavezno obuhvati i izmjena člana 36. Stav 1. I to na način da se postojeći tekst na kraju stava „osnovnim i srednjim školama mogu osnovati školsko sportsko društvo“ izmijeni riječima „osnovnim i srednjim školama osnivaju pškolsko sportsko društvo“.
- Takođe, Komisija traži posebno objašnjenje činjenice da se postojećim zakonom i izmjenama i dopunama Zakona uvodi poseban oblik profesionalnih sportskih društava koji se zakonom kategorišu kao privredna društva. Nedovoljno je definisano ko osniva ova sportska društva, koliki je početni kapital, te takođe nije jasno kad i u kojim takmičenjima može nastupiti amaterski sportski klub a kad mora biti profesionalni. Ovo iz razloga postojećih klubova koji su organizovani kao amaterski sportski klubovi, te u slučaju da se isti ne mognu takmičiti u višem rangu dovodi se u pitanje ko će biti njihov osnivač kao privrednih društava. Smatramo da postojeće stanje sportskih klubova na području kantona nije spremno za tranziciju u privredna društva, te da postojeći Zakon i predložene izmjene i dopune nisu dovoljne da bi se bez problema ista mogla sprovesti.

Komisija predlaže Ministarstvu da prilikom izrade Prijedloga Zakona o izmjenama i dopunama Zakona o sportu posebno ima u vidu navedene primjedbe i sugestije u cilju što kvalitetnije izrade Zakona koji će svakako doprinijeti razvoju sporta na našem Kantonu“.

Nihad Krajinović, Predsjedavajući Vijeća:

„Da samo pojasnim kolegama. Ova dva nacrtta Zakona su bila predložena na dnevni red ali Kolegij je donio i zauzeo stav da Komisija za obrazovanje o ovome raspravlja zbog ograničenosti s vremenom. I Evo čuli ste stavove Komisije koji su upućeni nadležnom Ministarstvu TK. A sada idemo dalje sa sjednicom“.

Prešlo se na raspravu o predloženom dnevnom redu 15. Sjednice Općinskog vijeća Gračanica. Predsjedavajući Vijeća je pročitao predloženi dnevni red od 9 tačaka koji glasi:

D N E V N I R E D :

1. PRIJEDLOG ODLUKE O DOPUNI PROGRAMA RADA OPĆINSKOG VIJEĆA ZA 2018.GODINU.

Izvjestilac: Nihad Krajinović, Predsjedavajući Općinskog vijeća.

2. PRIJEDLOG ODLUKE O FINANSIRANJU KLUBOVA VIJEĆNIKA U OPĆINSKOM VIJEĆU GRAČANICA.

Izvjestilac: Nihad Sinanović, Šef Službe za poduzetništvo, lokalni razvoj i finansije.

3. PRIJEDLOG ODLUKE O SARADNJI VIJEĆNIKA SA MJESNIM ZAJEDNICAMA.

Izvjestilac: Nihad Krajinović, Predsjedavajući Općinskog vijeća.

4. PRIJEDLOG ODLUKE O DIMNJAČARSKOJ DJELATNOSTI.
Izvjestilac: Aida Hodžić, Šef Službe za prostorno uređenje, geodetske i imovinsko-pravne poslove.
5. IZVJEŠTAJ O REALIZACIJI PROGRAMA RADA OPĆINSKOG VIJEĆA ZA 2017.GODINU.
Izvjestilac: Nihad Krajinović, Predsjedavajući Općinskog vijeća.
6. IZVJEŠTAJ O RJEŠAVANJU UPRAVNIH STVARI U UPRAVNOM POSTUPKU U SLUŽBAMA ZA UPRAVU OPĆINE GRAČANICA U 2017.GODINI.
Izvjestilac: Alma Buljubašić, šef Službe za upravu, društvene djelatnosti, boračko-invalidsku zaštitu i zajedničke poslove.
7. IZVJEŠTAJ O IZVRŠENIM PROCJENAMA PROMETA NEPOKRETNOSTI I PRAVA ZA 2017.GODINU.
Izvjestilac: Razija Junuzović, Predsjednica Komisije.
8. IZVJEŠTAJ O IZVRŠENIM MJERENJIMA ZADOVOLJSTVA GRAĐANA JAVNIM USLUGAMA I RADU OPĆINSKOG VIJEĆA.
Izvjestilac: Aida Hodžić, Koordinator MEG Projekta.
9. INICIJATIVA KOORDINACIJE BORAČKIH UDRUŽENJA OPĆINE GRAČANICA ZA IZMJENU ODLUKE O UTVRĐIVANJU ZNAČAJNIH DATUMA NA NIVOU OPĆINE GRAČANICA.

Učesnici u diskusiji su:

Hasan Puškar:

Komisija za propise i Statut je na svojoj sjednici razmatrala pomenuti dnevni red i predlaže da se tačka 4 Prijedlog Odluke o obavljanju dimnjačarske djelatnosti povuče sa dnevnog reda. Odnosno Komisija predlaže da se ta odluka ne razmatra na 15. Sjednici Općinskog vijeća.

Naime, u toku su izmjene i dopune Zakona o komunalnim djelatnostima a i Programom rada Općinskog vijeća Gračanica za 2018. godinu mislim na aprilskoj sjednici su predviđene da se razmatraju Odluka o komunalnom redu i Odluka o vršenju komunalne djelatnosti, tako da ovu Odluku treba razmatrati nakon usvajanja navedenih odluka“.

Prijedlog Komisije za propise i Statut usvojen je jednoglasno.

Dnevni red bez tačke 4 usvojen je jednoglasno i glasi:

D N E V N I R E D :

1. PRIJEDLOG ODLUKE O DOPUNI PROGRAMA RADA OPĆINSKOG VIJEĆA ZA 2018.GODINU.
Izvjestilac: Nihad Krajinović, Predsjedavajući Općinskog vijeća.
2. PRIJEDLOG ODLUKE O FINANSIRANJU KLUBOVA VIJEĆNIKA U OPĆINSKOM VIJEĆU GRAČANICA.
Izvjestilac: Nihad Sinanović, Šef Službe za poduzetništvo, lokalni razvoj i finansije.

3. PRIJEDLOG ODLUKE O SARADNJI VIJEĆNIKA SA MJESNIM ZAJEDNICAMA.
Izvjestilac: Nihad Krajinović, Predsjedavajući Općinskog vijeća.
4. IZVJEŠTAJ O REALIZACIJI PROGRAMA RADA OPĆINSKOG VIJEĆA ZA 2017.GODINU.
Izvjestilac: Nihad Krajinović, Predsjedavajući Općinskog vijeća.
5. IZVJEŠTAJ O RJEŠAVANJU UPRAVNIH STVARI U UPRAVNOM POSTUPKU U SLUŽBAMA ZA UPRAVU OPĆINE GRAČANICA U 2017.GODINI.
Izvjestilac: Alma Buljubašić, šef Službe za upravu, društvene djelatnosti, boračko-invalidsku zaštitu i zajedničke poslove.
6. IZVJEŠTAJ O IZVRŠENIM PROCJENAMA PROMETA NEPOKRETNOSTI I PRAVA ZA 2017.GODINU.
Izvjestilac: Razija Junuzović, Predsjednica Komisije.
7. IZVJEŠTAJ O IZVRŠENIM MJERENJIMA ZADOVOLJSTVA GRAĐANA JAVNIM USLUGAMA I RADU OPĆINSKOG VIJEĆA.
Izvjestilac: Aida Hodžić, Koordinator MEG Projekta.
8. INICIJATIVA KOORDINACIJE BORAČKIH UDRUŽENJA OPĆINE GRAČANICA ZA IZMJENU ODLUKE O UTVRĐIVANJU ZNAČAJNIH DATUMA NA NIVOU OPĆINE GRAČANICA.

TAČKA 1

PRIJEDLOG ODLUKE O DOPUNI PROGRAMA RADA OPĆINSKOG VIJEĆA ZA 2018.GODINU.

Nije bilo učesnika u diskusiji i Odluka o prijedlogu Odluke o dopuni Programa rada Općinskog vijeća za 2018.godinu je usvojena jednoglasno.

TAČKA 2

PRIJEDLOG ODLUKE O FINANSIRANJU KLUBOVA VIJEĆNIKA U OPĆINSKOM VIJEĆU GRAČANICA.

Hasan Puškar je iznio stav Komisije za propise i Statut:

„Komisija za propise i Statut je razmatrala Odluku o finansiranju klubova vijećnika u Općinskom vijeću Gračanica i ulaže slijedeći amandman.

Da se član 10. stav 1. na kraju rečenice dopuni sa riječima:

„Najkasnije do 30. 06. tekuće godine za predhodnu godinu“.

Iza stav 1. člana 10. dodaje se novi stav 2 koji glasi:

„Ukoliko klubovi vijećnika ne dostave finansijski Izvještaj u roku iz stava 1. ovog člana obustavlja se daljnje finansiranje kluba i političkog subjekta“.

Učesnici u diskusiji po ovoj tački dnevnog reda su:

Džemal Jukan:

„Kako je predsjednik Komisije uložio amandman na ovu Odluku, a ja ću postaviti jedno pitanje. Obzirom da u ovoj Odluci, u pojašnjenju Odluke, obrazloženju stoji pod b) pročitati ću, 60 % sredstava dijeli prema broju poslaničkih odnosno delegatskih mandata koje svaka politička stranka, koalicija političkih stranaka, odnosno nezavisni kandidat i ovo naglašavam, ima u trenutku dodjele mandata. Ovo stoji u Zakonu. Znači, u trenutku dodjele mandata. Ovamo u samoj Odluci, prepisalo se odprilike ovo, jeli sračunato ili slučajno

izostavljeno, čitam kako stoji u Odluci.Znači, poglavlje dva, raspodjela sredstava i izvještavanje, pa isto pod b) pri dnu imate 60 % sredstava dijeli prema broju vijećničkih mandata koje svaka politička stranka, koalicija političkih stranaka, lista nezavisnih kandidata i samostalni vijećnici, imaju u Općinskom vijeću.Znači, Zakon je rekao u trenutku dodjele ovamo kažem imaju, to je velika razlika.Ja sam jedan od poslanika koji je izašao iz kluba u Skupštinu TK pa sam bio nezavisni kandidat.Tad smo pitali Centralnu izbornu Komisiju, šta raditi.Jeli mandat pripada pojedincu ili pripada stranci, šta sa novčanim sredstvima itd.Pa su došla tumačenja da ipak mandat pripada pojedincu koji je dobio mandat.međutim poslije su ovo promijenili i stavili u zakon, u vrijeme dodjele mandata računajući na to da prelasci iz stranke u stranku ne povlače, ovaj dio za sobom da faktički nose i sredstva.Ja samo pitam jeli usklađeno sa zakonom, je li pravno, ako jest podržat ćemo to nije problem.Ima diskusija da zakon o finansiranju političkih stranaka se ne odnosi na Općinska vijeća, nego je to za nivo, gore, međutim pozivamo se na taj zakon, iz njega uzimamo članove crpimo, eh sad hoćemo li ga poštovati do kraja ili ne.Evo to je moje pitanje“.

Džebo Senahid:

„U potpunosti se slažem sa kolegom Jukanom i odnosi se tačno na ista postavljena pitanja s tim da bih ja dodao još u članu 7, tačka 2 gdje kaže vežu se za samostalne vijećnike koji su napustili političke subjekte.I sad ja postavljam pitanje, ako je klub vijećnika u Vijeću Općine Gračanica dva, a imamo takvih klubova i oba su napustili i proglasili se samostalni nekakvim i nezavisnim, oni znači ova sredstva povlače direktno na svoje račune i eventualno evo kad dođu naredni izbori formirat će se klub i ta sredstva će ići na taj klub.Znači ovih 60 % ukoliko dođe do toga na ovakav način ljudi mogu povlačiti direktno na svoje žiro račune.Ko će tu podnositi izvještaj, kome se podnosi izvještaj o utrošenim sredstvima? I mislim da ovo u potpunosti treba da se usaglasi sa ovim Zakonom gdje kaže samo nezavisni kandidat ima u trenutku dodjele mandata, bez obzira kako je ko, uredu je ukoliko čovjek napusti jednu političku partiju i pređe u drugu političku partiju, ta sredstva da vuče za sobom.Ali napustit političku partiju, napustiti klub, povući sredstva sebi i kasnije se vratiti i zanima me kolika su to sredstva?

Edin Ibrišević:

„Prvo bih da repliciram kolegi Džebi, mislim da jezik govora „nekakvi“ nismo mi nekakvi. Znaš ti kakvi smo i šta smo. I Da se to ne koristi u buduće više, nije uredu, nije prikladno. Druga stvar na koju se ja ovdje pozivam i što ja pitam, je šta stoji u budžetskoj stavci? Da li stoji finansiranje političkih partija ili stoji finansiranje rada parlamentarnih grupa, klubova vijećnika itd.? Ukoliko stoji političkih partija, ove primjedbe i sugestije su u potpunosti na mjestu.Ukoliko stoji, da se finansira rad parlamentarnih grupa, odnosno klubova vijećnika, ne znam, zašto bi neki klub bio prioritetan jedan a drugi ne. Dalje, i da se vratim na to prvo ukoliko stoji političkih partija, a ne stoji, šta kad prestane s radom politička partija, a ne neko je napusti.Toliko“.

Senahid Džebo:

„Meni je žao kolega Ibriševiću u koliko si se ti našao u ovome.Zašto govorim nekakvi.Mi ovdje izađemo za ovu govornicu i proglasimo se da smo nezavisni.Jeli to ili nije dostavljeno na papiru a evo u narednoj tački ćemo dobiti da u potpunosti ne vidim nikakve tamo u izvještaju o radu, odnosno o strukturi Općinskog Vijeća Gračanica da postoji i jedan nezavisni ili samostalni.Ni jedan iz tih razloga to navodim.Ja apsolutno nisam na tebe aplicirao a ako si se ti tu pronašao, to je tvoje.ja ovdje govorim, šta će se desiti sa tim sredstvima, ukoliko su dva čovjeka izaša su, vuku ta sredstva sebi na račune a sutra će se ponovo pojaviti, osnivaju klub.Ovdje se priča o finansiranju klubova“.

Edin Ibrišević:

„Da nebi bilo zabune, evo šta hoću da kažem. Mi ne želimo apsolutno nikakva sredstva namijenjena za rad političkih partija. I tamo stoji iznos od 30 % tih sredstava ide političkoj partiji. Mi ne želimo ta sredstva. Ta sredstva neka idu na partiju kod koje je uzet mandat, međutim ta partija je ugašena, postoji jedan račun tako da će ta sredstva ostati i dalje u budžetu Općine Gračanica jer se nemaju gdje uplatiti. Ono o čemu mi ovdje govorimo, govorimo o radu parlamentarne grupe, odnosno kluba vijećnika. I zna se za šta su ta sredstva namijenjena, kako se troše i šta predviđaju“.

Hasan Puškar:

„Ovo bi moglo ono što je Senad na Komisiji rekao, masovno bi počeli napuštati klubove i praviti se sam svoj. Mi u svojim strankama, malo bar u ovim većim, nemamo dodira sa svim parama, niti znamo koliko dolazi i ništa. Sto posto liježe na račun stranke. I zna se tačno gdje trošimo sredstva, jer svi imamo i zaposlene radnike, prostore, grijanje itd. međutim, kad malo bolje razmislim, pa nebi bilo loše napustiti klub i ići u samostalni, jer 60 % bi lično u moj džep još išlo para osim paušala. Ja se sad pitam pošto imamo amandman, kako se misle opravdati sredstva, na koji način? Evo sutra ja odem i kao samostalni vijećnik na koji način ja mogu opravdati sredstva jer ovo nisu sredstva koja pripadaju vijećniku. Ovo pripada Klubu, stranci itd. Na koji način se misli, ukoliko bude usvojen ovaj amandman? Po meni ja mislim da mi danas nismo spremni za donošenje odluke jer se i u pauzi pojavilo puno pitanja i nejasnoća, pa predlažem da se napravi pauza, da nebi nekom pare išle lično. Ustvari ići će, kad mi ovo usvojimo, 60 % tih sredstava će lično lijegati na račune tih na koje se bude odnosilo. Znači na lične račune. Evo ja postavljam pitanje, kako će oni opravdati ukoliko mi usvojimo. A ustvari svi smo mi dužni opravdati sredstva koja dobijemo. Predlažem pauzu pa da se o ovome van govornice raspravi, po mogućnosti da se odloži itd. Da se malo ozbiljnije uključimo u ovo“.

Puškar Hasan se ponovo javio za diskusiju:

„Mi raspravljamo o ovome, jer mi ovo trebamo definisati našom odlukom, Zakon ne govori o ovome. Mi možemo reći ne može, može 20 %, 10 %, nikako itd. Mi smo dužni ovo prilagoditi Zakonu, a Zakon nije definisao 100 % omjer. Može umjesto 30 da bude 100 % i gotovo. A zato kažem da nebi ulazili u dalju diskusiju i brzali, možda pauza, pa da izdefinišemo jer Zakon nije rekao 10, 30 i 60 % da se odmah zna, jeli tako. To mi možemo mijenjati“.

Edin Šehić:

„Pa evo obzirom da će se raspravljati ja bih zamolio samo da, uvezat ću se na diskusiju kolege Džemala. Vezano za ovo nezavisni kandidat ima u trenutku dodjele mandata. Bez obzira kako raspoređivali sredstva da li 100 % da li 30 ili 60 % sasvim je svejedno, da imate na umu ovo što kaže, u trenutku dodjele mandata. Dakle, ukoliko je nezavisna lista izašla na izbore, prošli su im mandati i imaju pravo na finansiranje, a ovako između od izbora do izbora da se dese da istupe mislim da nemaju pravo po trenutno važećem Zakonu o finansiranju političkih stranaka u BiH. Tako da to imate na umu bez obzira kako se raspoređivalo, da imaju pravo oni koji su ostvarili mandate po završetku izbora u kojoj su stranci bili kao nezavisna lista“.

Data je pauza u trajanju od petnaest minuta.

Nakon pauze Nihad Krajinović, predsjedavajući Vijeća je definisao zaključak:

„Odluka o finansiranju klubova vijećnika u Općinskom vijeću Gračanica usvaja se u formi Nacrta“.

Klubovi vijećnika dužni su primjedbe i prijedloge na Nacrt Odluke dostaviti Stručnoj službi Općinskog vijeća do 15.02.2018.godine.

U sali je prisutno u tom trenutku bilo 26 članova jer je opravdano izašao Dizdarević Kemal.

Sa 23 glasa „ZA“ i 3 „SUZDRŽANO“ usvojen je zaključak.

TAČKA 3

PRIJEDLOG ODLUKE O SARADNJI VIJEĆNIKA SA MJESNIM ZAJEDNICAMA.

U sali je bilo prisutno tada 27 članova Vijeća jer se na sjednicu vratio i Kemal Dizdarević.

Hasan Puškar je iznio stav odnosno amandman Komisije za propise i Statut:

„Komisija za propise i Statut je razmatrala prijedlog Odluke o saradnji vijećnika sa mjesnim zajednicama i ulaže slijedeći amandman:

Da se u stavu 1. Član 3. iza riječi „redovne posjete mjesnim zajednicama dodaju riječi, a najmanje jednom u tri mjeseca“ tako da stav glasi: „Saradnja imenovanih vijećnika s mjesnim zajednicama u smislu Odluke podrazumijeva redovne posjete u mjesnim zajednicama, a najmanje jednom u tri mjeseca, omogućavanje građanima mjesnih zajednica komunikaciju s vijećnicima o čemu se vodi poseban zapisnik i lista prisustva građana“.

Ovo predlažemo jer smo se rukovodili tim da ne bude, oformi se komisija ne ode nikad ili ode jednom, nego da ta grupa najmanje jednom u tri mjeseca obiđe ili ako ne mogu svi, da bar jedan vijećnik i izvještaj dostavi predsjedavajućem“.

Predsjedavajući Vijeća je dodao:

„Ovo se ne mora odnositi samo na Vijeća MZ i sastanke, nego može i zbor građana, što je i bolje da se čuje šta građani imaju za reći“.

Dženana Tukulj:

„Samo malo, jedno pojašnjenje, pošto vidim da vijećnicima nije dobro jasno.MEG Projekat je od nas tražio građanski sat, na što mi da kažem nismo pristali nego nismo smatrali efikasnim.Donijeli smo ovu Odluku u kojoj zadužujemo vijećnike za građane pojedinih mjesnih zajednica.Nije zatvoreno, znači ovdje je minimum.Svaki vijećnik koji smatra da može još, otvoreno je dođite predsjedavajućem.Zašto tražimo zapisnik, primjetit će te da tamo kod raspodjele nisu vijećnici dobili MZ u kojima su inače, izuzev MZ Gračanica jer tu se već smatra da građani imaju prilike sa vama da komuniciraju.Ukoliko mi danas usvojimo ovakvu odluku i ona bude imala neki svoj rezultat iz MEG-a odnosno UNDP-a su rekli da će ovaj princip primjeniti u svim općinama i Federacije i RS-a.Upravo da ne bude vijećnik radi samo u svojoj MZ.Ovdje se ne odnosi na praćenje rada Vijeća MZ, nego omogućavanje građanima, da se vama kao vijećnicima obrate tamo odakle oni dolaze, da ne dolaze na građanski sat ovdje u ovu salu“.

Predsjedavajući vijeća Nihad Krajinović je dodao:

„Kad su u pitanju zapisnici ja sam vama jednom prilikom dostavio primjer obrasca, ali nije problem mogu ja to učiniti ponovo i dostaviti vam“.

Učesnici u diskusiji su:

Edin Šehić:

„Evo MEG Projekat tako rekao mi smo odlučili.Malo ću prodiskutovati.Ja nisam dobio nikakav prijedlog ovih imena, to sam dobio tek u materijalu tako da ne znam da li je neka kolala dokumentacija.Evo ukoliko se može dobrovoljno prijaviti ja bih se prijavio još za Stjepan Polje i Malešiće.To je pod jedan.Druga stvar, na osnovu čega su dodjeljivane MZ? Jesu li se vijećnici zaista prijavljivali ili je nekakav raspored bio, jer nije ravnomjerno raspoređeno.Neki vijećnici su samo u jednoj MZ zastupljeni a imamo dva vijećnika, a to je Čamdžić i Topčagić u četiri MZ.Mislím da i tu malo trebamo poraditi obzirom da je izborna godina ispred nas i svašta se tu može protumačiti korisno.Treća zamjerka je za MZ Gračanica tako da u MZ Gračanica neće biti prisutan ni jedan vijećnik iz drugih MZ. U Gračanici su svi iz Gračanice pa čak se i Predsjedavajući stavio tamo na spisak, iako koridínira sve MZ.Tako da bih zamolio da ubacite nekoga i iz drugih ruralnih MZ, a ne samo iz grada.I ono što bih na kraju kao zaključak predložio ispred Kluba Stranke za BiH da Kolegij pripremi za sljedeću sjednicu Općinskog vijeća smjernice, odnosno ono šta trebaju ti vijećnici ili kako mi zovemo komisije, da donesu sa terena.Da li je to ono o čemu smo diskutovali prošle godine, stanje imovine, stanje vodovoda, da li imaju opremljenu kancelariju, da li poštuju Statut.Dakle, smjernice koje će Općinsko vijeće na narednoj sjednici donijeti da se sprovede u svim MZ-a, da imamo sistemski riješene probleme po svim MZ-a.To je prijedlog zaključka ispred Stranke za BiH i nadam se da ćete uvažiti, da bi imali na narednoj sjednici šta tačno želite da postignemo sa poboljšanjem kvaliteta u MZ-a“.

Predsjedavajući Vijeća Nihad Krajinović:

„U članu 3 kaže se, saradnja imenovanih vijećnika s MZ-a u smislu ove Odluke podrazumijeva redovne posjete MZ-a, najmanje jednom u tri mjeseca, omogućavanje građanima MZ-a komunikaciju s vijećnicima o čemu se vodi zapisnik.Nećete vi stanje ureda Vijeća MZ, možete i to nije problem, ali vi ste zaduženi za rad s građanima.Šta građani kažu o mjesnim zajednicama.Planirali smo evo, da Vijeće MZ zakaže zbor građana i vi se pojavite i razgovarate“.

Topčagić Mirzet je replicirao:

„Evo na žalost ja moram reći, kolega Šehić, proteklu godinu dana priča i non-stop diskutuje o lošem stanju u pojedinim MZ i u tom dijelu bi se ja s njim i složio.I evo konačno mi sad nešto pokrenemo da radimo i vama zapara oči neravnomjerna raspoređenost vijećnika.I spominjete odmah neku političku kompaniju.Evo s ovog mjesta ja predlažem gdje god sam ja raspoređen vi izvolite, kampanizirajte, radite šta hoćete, ali ovo je da se mijenja sve ono što pričate godinu dana“.

Šehić Edin:

„Kolega Topčagiću, zna se ko je parlamentarna većina u Općinskom vijeću i šta smo mi sve inicirali ovu godinu dana, a ništa se nije uradilo.Molim vas, uz dužno poštovanje,

hajmo raditi na terenu. Nisam ja rekao, a spomenuo sam jer sam našao Topčagić i Čamdžić. Ja sam se evo javio dobrovoljno za Stjepan Polje i Malešiće, nadam se da će se uvažiti i da će se staviti na spisak. Kažu da sam puno govorio za Malešiće i Stjepan Polje u vezi Statuta, evo ja se stavljam na raspolaganje da se to tamo uredi. Ja hoću da radim“.

Predsjedavajući Vijeća je zamolio da Šehić pismeno dostavi ko je to parlamentarna većina pošto on ne zna, nema informaciju o tome“.

Hasić Ibrahim:

„Ne znam šta bih rekao na ponudu kolege Šehića. Vas može Predsjedavajući imenovati za određeno mjesto, određenu MZ ali molba treba doći u MZ, da li možete vi doći ili ne. Ja ovo ozbiljno govorim, baš iz razloga toga što tražite izričito. A ako ja vama dam zeleno svjetlo, a nemam razloga da ne dadnem onda ćete i imati šta vidjeti u MZ. Ali imovina MZ, ja vodim računa i Vijeće MZ o imovini MZ i treće lice ne može zavirivati tamo gdje mu nije mjesto“.

Džemal Jukan:

„Izgleda da je naj vruće u MZ-a. Ovo što je Šehić predlagao, ja duboko vjerujem da ima smisla. Jer, ako ćemo doći u MZ, nebitno kako smo izmiješani i raspoređeni i pozvat će MZ, Vijeće MZ i građane i onda će reći, evo vam gospodo oni i neka vam oni objasne zašto nije došao kamion rizle, što nema vode, što je ono i mi ćemo se naći u toj situaciji da sjedimo, nespremni da ga odgovorimo na neke stvari koje građani pitaju, a gospođa iz MZ zna i odgovore. Zašto nama, zašto nije došlo, ko je radio, kad će, šta je prioritet itd. Tako da ovo što ste stavili pod a) razgovor sa građanima, uredu, treba to raditi i može biti jedan djelokrug ove grupe vijećnika, ali mislim da je ono što je Šehić rekao prije, broj jedan. Mora neko donijeti ovdje zapisnik da nema uslova u MZ Pribava, da Vijeće može raditi. Da nema računara, nema stola, nema ovog ili onog, da se tu sjednice i ne održavaju. Zatim probleme koje tamo imaju, voda i slično, na što težište treba staviti. Mislim da su to puno ozbiljnije stvari, ako hoćemo tu neku vezu MZ i Opštinskog vijeća i da se informišemo ovdje. Naučite se neke stvari koje su kvalitetnije riješene nego što mi rješavamo ovdje. Sve je to bogatstvo i sve je to neko iskustvo. Ali da vam kažem, ako ćemo ići tamo i da nas Vijeće MZ izloži u prvi plan i da odgovaramo na pitanja građana, mislim da nije to cilj“.

Senahid Džebo:

„Odluka o saradnji vijećnika sa MZ tako glasi. Ovdje su ljudi sebi protumačili da je ovo supervizija za V MZ-a, koliko sam ja vidio iz ovoga. Ovo je supervizija vaša. Ničeg me nije strah gospodine Džemale, bujrum svaki dan. Imaju organi koji su za to zaduženi, a ne pada mi na pamet jednoj ovdje gospodi. Hasan Puškar je spomenuo ovdje politikanstvo. Zašto? Pojavite se gospodo pred izbore i zaboravite te MZ. Tražim ovdje sad odmah i pauzu i spiskove koliko vijećnika u Opštinskom vijeću Gračanica učestvuje u radu Vijeća MZ sa mjestom prebivališta, pa ćemo ići dalje i raspravljati“.

Vahidin Smajlović:

„Ovo pitanje već smo više puta napominjali, problema stanja u MZ i te vruće teme i neka je to tako. Ja smatram da ova Odluka koja je donešena po MEG projektu, inicijator ove Odluke je MEG projekat, a trebali smo i mi prije toga inicirati, je veoma bitna. Bitna je iz razloga, što mi smo svjesni da imamo MZ koje nemaju svoje vijećnike u Opštinskom vijeću. To je broj jedan. Broj dva ovo što je rekao kolega Senahid i Džemo, broj dva je jako

jako važno pitanje, poštovane kolegice i kolege, koliko smo mi kao vijećnici, zaista uključeni u rad Vijeća mjesnih zajednica. Neki su vijećnici, neki su predsjedavajući Vijeća. Ne možemo svi biti vijećnici, uredu, ali možemo i onda bi nam sve ovo lakše padalo, ovako kad razgovaramo. Mislim da bi zaista o ovome trebali povesti računa, ako neko nije, da se uključi i da pomogne, da vidi, pa bi onda kad bi se raspravljalo o ovim temama, vjerovatno malo i drugačije razgovarali. Šta dalje mislim? Smatram da ova Odluka komisije, nemojte da dozvolimo da to ispadne evo mi smo neka supervizija, super kontrola ili neka komisija koja dolazi u MZ i da nešto kontroliše i da nešto ispituje. Svi smo mi pismeni, obrazovani ljudi i znamo mi, ne treba nama puno ni dostavljati neke obrasce, šeme, šta mi to trebamo uzeti, a kao ove ankete koje su rađene, imate li ovo, imate li ono? Svi mi znamo odprilike o čemu treba da razgovaramo. Šta to boli ljude u MZ, nametnut će se nama još stotine pitanja koje bi možda mogli mimo toga obrazca. Znači jednostavno to treba da shvatimo kao jednu pomoć, jednu saradnju. Znači pomoć naša Vijeća MZ apogotovo, opet kažem, onim MZ gdje nema vijećnika u gradskom vijeću. Na taj način da to nekako iskoristimo i da uspostavimo jedan vid komunikacije. Pitanje će biti i kako uspostaviti komunikaciju, jer mi imamo MZ koje u toku jedne godine ne naprave ni jedan zbor građana. Ne možemo sad mi vijećnici iz ovih komisija odlaziti tamo i jednostavno ganjati ljude po sokacima i slično. Nebi bilo ni lijepo da jedan kolega naš ili komisija da sama ide, šeta po MZ ako bar Vijeće MZ nije zajedno s njima. vezano za ove liste, čini mi se da smo u oktobru dobili, odnosno svi klubovi su dobili ove liste i rečeno je uzmite, razmotrite, pregledajte, dali ima neko želju da bude u ovoj ili drugoj MZ. Neka se zamijeni gdje mu odgovara. Imali smo vremena i evo ponovo je dato, a mi nismo odradili, nego sad govorite ko bi gdje, e ne može po meni sad jer smo imali dovoljno vremena, a iduće godine o tome ćemo malo više povesti računa“.

Šehić Edin:

„Želim samo da pojasnim vezano za smjernice koje sam rekao ovdje da se trebaju donijeti. Nisam mislio ni na kakvu superviziju, niti sam mislio na neku kontrolu. To je samo da dobijemo pravo stanje po MZ, što već traje godinu dana. zašto se pojedinci boje da se vidi stvarno stanje MZ. Niko nikoga neće ni sankcionisati niti će nešto poduzeti. Ako je to super u Stjepan Polju i malešićima hajmo to prekopirati za sve MZ. Zašto je to problem? Znači za sledeću sjednicu da se pripreme smjernice šta ćemo raditi na terenu i to usvojimo i tako radimo. Ne vidim zaista problem u vezi s tim. Ja i neću ići, evo jer sam i onako sa Hasićem u grupi u dvije MZ i on će mene dosta toga naučiti, tako da i ne trebam ja ići ni u Stjepan Polje ni u Malešiće. Ali zaista mislim da moramo usvojiti smjernice šta trebamo donijeti sa terena, ništa više“.

Fadil Mešić:

„Ova odluka u samom početku nije kako treba. Odluka vijećnika sa MZ ne piše tako nego sa građanima je komunikacija. Šta su konkretni zadaci vijećnika koji idu? Šta? Odemo i kafu popijemo gore. Gdje ćemo zapisnik napraviti ako neko neda ući u prostorije MZ? Predsjedavajući ti si koordinator ovdje. Ovdje u obrazloženju piše građanski to jest vijećnički sat nije uspio a nismo ga ni probali. Ja sam još 2005. godine ga predložio i svi ste ga tad odbili. valjda se bojali, ne znam. Eto nismo ni probali a kažete ovdje da građanski sat nije uspio, a bilo bi efikasnije. nećemo mi raditi sa vijećnicima MZ-a, ne, utisci sa građanima.“

Predsjedavajući Vijeća Nihad Krajinović je odgovorio:

„Da ste dolazili na sastanke sa koordinatorima MEG-a znali bi ste šta se traži. A oni koji su dolazili, mislim na vijećnike rekli su da građanski sat ne može, a i drugi su nam rekli da nisu se opredijelili za građanski sat i mi smo uradili ovako. I piše ovdje u cilju efikasnije saradnje Općinskog vijeća sa građanima MZ-a. A gdje ćete kafu popiti to je moja odgovornost ja ću obezbijediti da popijete kafu“.

Džebo Senahid:

„Nastavlja se supervizija.Ni jedna sjednica Vijeća MZ nije zatvorena ni za kog, znači za građane, posjetitelje a pogotovo za Općinske vijećnike.Ja ne vidim ovdje da može iko ikoga odbiti, da ne prisustvuje sjednici Vijeća MZ-a.Ono što ja potenciram i šta hoću da kažem.Šta može učiniti vijećnik u drugoj MZ ukoliko nije uključen u radu svoje MZ. A ovdje smo fino naveli u zaključku odnosno u obrazloženju, ovo posebno što su sami vijećnici uključeni u rad svojih Vijeća MZ-a.Upravo o ovome govorimo.Evo ljudi ovdje izlaze konstantno i pitaju tražimo stanje tamo, tražimo stanje ovamo.Nemate potrebe Stjepan Polje dostavilo je svake godine na kraju i finansijski izvještaj i izvještaje o održanim sjednicama i sve odluke.Bujrum, svaki dan možete doći i uvjeriti se u to, ali mi ne pada na pamet da se neko pojavi odavde i da kaže da je on supervizor, što znači da mi ne radimo svoj posao.Vi nas znači ovdje ponižavate.A vodite računa i šta ćete obećati ljudima, kao što ste obećavali, pa se onda mi gušimo s građanima jer ste nas ostavili. I dalje tražim spisak vijećnika koji nisu uključeni u rad Vijeća MZ-a.

Hasić Ibrahim:

„Ovo je replika kolegi Mešiću. Mnogo bi bio kolega Mešiću upoznatiji da njegov član Vijeća MZ Malešići našao za shodno da bar jednom dođe na sjednicu Vijeća MZ.I da vam kažem, dobro bi bilo, a neko je čini mi se ovdje iz klupa pomenuo da vidimo koliko to ko participira, ispred koje političke partije u vijećima MZ-a. Da li se odazivaju? Zahvaljujući u Malešićima kako je, došao sam u poziciju da nemam čvrsta dva vijećnika iako ja imam većinu, praktično bih radio na rubu kvoruma. Za mene sve što je unutra, sve odluke treba da idu konkonzusom. I idu sve što dođe na Vijeće MZ, u mene odluke idu konkonzusom. Na žalost ne dolaze ljudi i samim tim je natezanje konopca.A što se tiče da li će meni neko doći u posjetu ili neće, pazite sve ovo zavisi od predsjednika Vijeća MZ-a.Ko god bude dolazio u Prijeko Brdo, zavisi od Rahima, tako je i sa ostalim MZ-a.Ako se može donijeti nešto dobro u MZ, uredu, ali u neke MZ ne može se donijeti ništa što već nije donešeno“.

Mešić Fadil:

„Da samo odgovorim.Imenovani vijećnik u Vijeću MZ Malešići, tačno da ne prisustvuje, iz razloga što nije mogao naći zaposlenje na našoj opštini.I može se bez njega raditi“.

Vahidin Smajlović:

„Malo bez razloga ovo komplikujemo.Nismo do sad imali da kažem neke komisije i zadužene vijećnike MZ.Ovo je dobro da krene i evo treba da krene da vidimo za šest mjeseci šta smo to napravili, pa da onda ponovo stavimo to kao tačku dnevnog reda, da o tome zaista razgovaramo.Po meni, opet kažem, ovaj projekat je dobar i može da uspije.Dobar iz razloga što će nam sigurno imati, dobiti bolje informacije o stanjima u MZ-a.Ovaj projekat može uspjeti samo da način i saradnja vijećnika Općinskog vijeća Gračanica sa Vijećima MZ-a i građana bude bolja.Zašto? Zato što su Vijeća MZ nosioci svih aktivnosti u mjesnim zajednicama.Oni su ti koji pokreću i akcije i zborove i sve. Bolji će se efekat napraviti ako budemo zajedno u dogovoru i saradnji to radili i kontaktirali.Ali opet kažem i to, da ćemo doći u situaciju da nema zborova, jer je pitanje hoće li ljudi doći ili ne.Znači dostaviti Vijeću MZ, imena komisija, dati brojeve telefona i da oni ostvaruju saradnju po potrebi.A ako Vijeće MZ hoće da sazove komisiju, uredu, ali ja ne mogu ići ako me neko neće da zove.Znači, mi treba da se postavimo kao jedna pomoć tim mjesnim zajednicama, a da nas ljudi ne shvate kao

neku kontrolu, jer je ljudima koji rade u mjesnim zajednicama, dosta svega, problema i teškoća i samo im i mi još trebamo kao neka kontrola i slično“.

Edin Ibrišević:

„Evo ako može, da budemo malo konstruktivni jer se odužilo.S obzirom da sam dolazio na MEG projekat koji se održavao ovdje i od prilike pristup koji sam ja ponio na način kako je on zamišljen.Nije zamišljeno da ekipa odavde dođe kao neka supervizija u MZ. A nije ni zamišljeno da ekipa koja će doći odavde vijećnika, odgovara tamo građanima na neka pitanja.Naš zadatak je samo, kad nas pozovu kad pripremimo MZ i nekakav skup da mi dođemo, malo poslušamo probleme koje će iznijeti vijećnici MZ, građani i da mi te probleme razumijemo na usvajanje budžeta, da ne budemo kategorični, da se njima poprave uslovi života.I to je sve. Neko je ovdje tražio spisak koliko ko radi i ko je angažovan u Vijeću MZ.To se vidi po vijećničkim pitanjima i inicijativama gdje šta predlaže.Mislim da smo svi vijećnici čitave opštine, a ne samo jedne MZ.Molim one koji imaju finansijsku naknadu da svoj rad u Vijeću MZ da ne drže takve kritike“.

Edin Šehić:

„Zamolio bih zaista Stjepan Polje i Malešiće da usklade svoje Statuse, da počnu raditi po zakonu pošto evo kažu da sve rade po zakonu, da krenemo od onog krovnog što trebaju imati pa onda da idem dalje.Druga stvar, ukoliko je ova komunikacija za sve ono šta ćemo mi donijeti iz MZ, vi podijelite svim građanima naše brojeve telefona, slobodno mogu nas uvijek pozvati i reći svoje probleme.Ako nećemo nešto konkretno raditi po MZ, s obzirom na velike probleme koji su se nakupili a ovo bila je sugestija i prijedlog za smjernice ja lično mislim da i ostale kolege Stranke za BiH neće učestvovati na ovakav način u ovom projektu“.

Senahid Džebo:

„Ja nisam tražio kolega Ibriševiću da se ovdje dostavi koliko ko radi u Opštinskom vijeću, nego naprotiv koji su opštinski vijećnici uključeni u rad Vijeća MZ i koji su prihvatili mandate u Vijeću MZ.Što se tiče, evo konkretno ste pitali, ko ima naknadu, ja dajem odgovor što se tiče Stjepan Polja.Predsjednik Vijeća MZ Stjepan Polje ima 200 KM mjesečnu naknadu za svoje troškove.U to spadaju i gorivo i telefon i sve druge aktivnosti, zanči i one kafe što se plaćaju.I za to se podnosi izvještaj na kraju svake godine, po Odluci Vijeća MZ.Bujrum, vi se uključite i kažite tamo da to čovjek radi džaba.Nikakav problem nije, apsolutno“.

Hasan Puškar:

„Jao šta sam plata za 12 godina propustio, džabnog rada.Ja bih da ovu diskusiju privedemo kraju.Ovdje nije kontrola MZ, ovo je da mi s građanima komunikaciju uspostavimo, koliko ja vidim.Druga stvar, ja bih samo malo sugerisao, da se ovdje u Gračanici izmijeni sastav ekipe koja će učestvovati.Samo su vijećnici iz dvije političke partije pa bih molio pošto je svugdje šarano da se i tu malo prošara.Nije bitno ko, samo da se predloži iz četiri političke partije i uključe s tim da iz SDA mora biti neko. Primjedba je mislim na mjestu, dva su iz Naše stranke i dva iz SDP i svi su iz Gračanice, dok u drugim MZ ni u jednoj nije vijećnik iz te MZ.Znači, po meni ni jedno od ovih ljudi nebi trebali biti tu. Ako smo tog principa da je to svugdje, da se držimo i tu.Primjedba je na mjestu, jer su samo u Gračanici iz Gračanice, a u ostalim MZ, ni jedan nije vijećnik u svojoj MZ.To je moja primjedba i pridružujem se prijedlogu kolege Džebe, da se dostavi spisak vijećnika koji su uključeni u rad Vijeća MZ, za neku od narednih sjednica“.

Nihad Krajinović:

„Samo jedno da kažem. Koliko ste neozbiljni vijećnici, evo potvrđuje se i na ovoj odluci. nekoliko puta dostavljali smo spisak vijećnika zadržanih za MZ, molili smo vas da dopunite, da dostavite vaše prijedloge za Program rada Vijeća za 2018. godinu, niste dostavili. Molili smo i prije toga nekoliko puta, jer je bio slučaj, na vrijeme imate trideset dana, niko ne donese ništa. I onda ovdje trošite vrijeme na sjednici, svađamo se, jedni drugima zamjerimo. Da se malo uozbiljite, ako ste toliko inteligentni i hoćete da radite, da pokažete svoj rad, onda se uključite kako treba. Kad vas neko zamoli i da vam priliku, onda dostavite svoje prijedloge na vrijeme. Stvarno smo neozbiljni“.

Džemal Jukan:

„Ja bih zamolio Predsjedavajućeg, da se ne ljuti, nije ovo problem u ovom trenutku, normalna diskusija je to. Ja ću u ime Kluba Stranke za BiH, obzirom da nismo shvaćeni, a u našoj programskoj aktivnosti je bilo da ćemo voditi računa o Vijeću MZ-a, da ćemo to pokušati stavljati na svoje mjesto itd. i evo obzirom da nismo dobro došli u MZ, mi se povlačimo iz ovih grupa. Prije nego što budemo Odluku izglasali, pa ove mandate gdje smo mi slobodno poredajte neke druge vijećnike, odnosno dajte nekom drugom. A ja u svojoj MZ radim, radim u nekim drugim MZ ali to je moje. Ne znam zašto bi neko imao spisak i čemu bi služio eventualno, evo ko je to angažovan ili nije angažovan. Ne znam šta to znači, tako da ti neki podaci, ne znam čemu će služiti“.

Hasan Puškar:

„Ne moraš nam Predsjedavajući držati predavanje. Radimo mi i ja sam više možda uradio za MZ, nego mnogi i nisam za taj posao ni plaćen i radim i radit ću. Non-stop sam u komunikaciji s građanima. I ovo što ste predložili, prvo pola nas neće nikad otići u MZ. Druga stvar svi da budu spremni jer će ga tamo napadati kad dođe. neće niko reći, dobro došao, nego što nije ovo, što nije ono i tome slično. Znači, ima nas, podvlačim, što smo non-stop u komunikaciji s građanima i koji rade s građanima i koji iznosimo sugestije. A ima nas koji nemamo nikakve komunikacije i koji idemo od izbora do izbora u MZ. Nismo svi isti. Ima nas ovdje koji pomažemo građanima lično i privatno nevezano za izbore i pomagali smo, a pomagat ćemo i kad ne budemo vijećnici. A ima nas ovdje koji smo došli da uzmemo paušal i nema nas više nigdje do slijedeće sjednice. Nismo svi isti podvlačim i predlažem u ime Kluba SDA pauzu i da ovo donesemo“.

Data je pauza u trajanju od deset minuta.

Sjednica je nastavljena, a za diskusiju se javio Alen Mujić:

„Što se tiče ove Odluke, ja je nisam shvatio kao superviziju MZ i smatram da je ovo uredu, vijećnici bi trebali više raditi i više provoditi vrijeme na terenu. A pošto su se kolege zakačile za rad pojedinih Vijeća MZ ja ću iznijeti slijedeće. Zamolio bih uz ovo što je kolega Senahid rekao, spisak vijećnika u Općinskom vijeću koji učestvuju u radu Vijeća MZ-a da se na ovaj spisak traži da predsjednici Vijeća MZ dostave i spisak vijećnika koji ne dolaze na sjednice Vijeća MZ-a i kojim političkim opcijama ti vijećnici pripadaju. Jer ima, evo konkretno u Vijeću MZ Donja Orahovica, dvije najveće političke stranke imaju devet vijećnika, od toga tri vijećnika ne dolaze na Vijeće MZ. Neka se navedu razlozi zbog čega ne dolaze, možda se i ne pozivaju, ne znam neka predsjednici Vijeća MZ to kažu. I evo sad postavljam pitanje, šta će se preduzeti prema tim vijećnicima koji ne dolaze u Vijeće MZ-a? Da li se ti ljudi mogu zamijeniti i na koji način? I još jedno pitanje šta je sa MZ-a koje krše Poslovnike i Statut MZ-a? “

Senahid Džebo:

„Ja ću samo kratko da odgovorim kolegi Džemalu.Svako je dobro došao i rekao sam ovdje kad smo raspravljali, diskusija kad je bila, da su sjednice Vijeća MZ-u Stjepan Polju otvorene za sve.I nije nikom zabranjeno i vi ste ovdje izašli i rekli da niste dobro došli.Naprotiv, mi ovdje tražimo da se svi aktivno uključite.Pogotovo ljudi koji participiraju, koji se nalaze tamo, koji žive, da se uključe“.

Bajrić Vahid:

„Evo pošto sam ja, predpostavljam i prozvan kao vijećnik Vijeća MZ Donja Orahovica, koji ne prisustvuje sjednicom Vijeća MZ.Zbog čega? Možda bi trebalo prvo kazniti one predsjednike Vijeća MZ-a koji ne šalju pozive vijećnicima, pa ne učestvuju u radu Vijeća MZ, pa tek se onda pitati kakav je razlog, zašto se ne saraduje? To bi bilo pošteno od njega, pa tek onda drugo raditi“.

Predsjedavajući Općinskog vijeća Nihad Krajinović je povukao prijedlog Odluke i nije tražio izjašnjavaње.

TAČKA 4

IZVJEŠTAJ O REALIZACIJI PROGRAMA RADA OPĆINSKOG VIJEĆA ZA 2017.GODINU.

Učesnici u diskusiji po ovoj tački dnevnog reda su:

Džebo Senahid:

„Što se mene lično tiče, ja bih pohvalio ovaj Izvještaj.samo mi je par stavki ovdje zasmetalo.Prikaz strukture Vijeća po klubovima u 2017.godini, mislim da ovo nije tačno.Znači prva strana uvodni dio, tabela 1.Možda bi bilo dobro ukoliko raspolaže s podacima sekretar ili predsjedavajući pa da nam daju tu informaciju, šta je kako je.Evo konkretno, klubovi vijećnika SDU-BOSS, ako znamo da imamo nezavisne kandidate a nisu ovdje uvršteni“.

Odgovor je dao Predsjedavajući da je Klub radio do predkraj 2017.godine.

Džebo Senahid je nastavio:

„I još jedno pitanje interesuje me hoće li sve prema MEG Projektu, hoće li sve inicijative i pitanja biti vezana za, lično ovdje vijećnike pa da se prozivamo na kraju koliko je ko uložio pitanja i inicijativa, da li su one imale smisla ili nisu, da je manje bitno?“

Predsjedavajući vijeća je odgovorio da će biti analiza i predviđa ona koliko je koji vijećnik uložio inicijativa i pitanja.Ali samo kao informacija, te nastavio:

„Vi imate analizu a ona će biti dopunjena sa analizom sa poslednje dvije sjednice.Imate tamo navedeno i naziv i odgovor, kome su upućene i sve“.

Alen Ibrišević je replicirao:

„Samo kolegi Džebi da repliciram.Ja sam bio SDU do decembra 2017.godine.Znači Klub SDU-BOSS je radio do decembra 2017.godine.Na decemarskoj sjednici sam se ja proglasio nezavisnim samostalnim vijećnikom.Samo da se zna“.

Hasan Puškar:

„Što se tiče inicijativa ili vijećničkih pitanja, znači ako se broji vijećničko pitanje ili inicijativa, što ne radi sijalica ili zašto je negdje-nešto, onda ja slijedeće sjednice gdje god prođem i vidim to ja trebam pitati. I na početku sam rekao, da mi treba malo da se uozbiljimo. Znači ako neko da inicijativu da se nešto uradi, valjda bi trebao i predložiti rješenje. Ima stvari koje se ne tiču načelnika, nego preduzeća koja se bave tim djelatnostima i pitanja treba da idu prema njima. Zato bih molio da nam se to izdefiniše, da nebi bilo da mi ne radimo ništa, nego ću ja imati onda svake sjednice po dva ili tri pitanja ili inicijative.“

Edin Ibrišević:

„Mislim, da smo odudarali od teme.Nije ovo tema i da nema smisla sad govoriti o tome i vrednovati ovdje.Ne znam ko sebi daje za pravo ovdje da vrednuje neku inicijativu da li je dobra ili nije.Mislim Predsjedavajući kada date Izvještaj u Izvještaju budu objavljene sve inicijative, neka građani sude o tome, da li nešto valja ili ne valja, da li je podnešeno kako treba ili nije podnešeno kako treba“.

Arnes Avdić:

„Samo jedna mala ispravka. Struktura vijeća, klubova u 2017.godini, u tabeli pod 6 BPS, treba da stoji BPS-Sefer Halilović. Tako samo da se doda“.

Hasan Puškar:

„Izvinjavam se što ovako upadam, ali našao sam s novinarima rješenje za sijalice.Od sada vijećnik kada vidi da ne radi sijalica, neka izvadi pare iz džepa i namiri sijalicu“.

Rasprava je zaključena i Izvještaj o realizaciji programa rada općinskog vijeća je usvojen jednoglasno.

TAČKA 5

IZVJEŠTAJ O RJEŠAVANJU UPRAVNIH STVARI U UPRAVNOM POSTUPKU U SLUŽBAMA ZA UPRAVU OPĆINE GRAČANICA U 2017.GODINI.

Nije bilo učesnika u diskusiji i Izvještaj o rješavanju upravnih stvari u upravnom postupku u službama za upravu Općine Gračanica u 2017.godini je usvojen jednoglasno.

TAČKA 6.

IZVJEŠTAJ O IZVRŠENIM PROCJENAMA PROMETA NEPOKRETNOSTI I PRAVA ZA 2017.GODINU.

Učesnik u diskusiji po ovoj tački dnevnog reda je.

Gadžić Rahim:

„Ne mogu da se ne javim i da ne kažem nekoliko stvari vezano za ovu komisiju koja radi.Evo Općinsko vijeće je predložilo mandat ovoj komisiji i evo vidimo da nismo pogriješili. Zašto ovo kažem? Oni su imali 593 zahtjeva i od toga 586 su realizovali.Kaže se, sedam nisu realizovali jer su podnešeni kasno u dvanaestom mjesecu negdje 27. 12. 2017.godine.Vidimo koje su prihode ostvarili i ovo je za svaku pohvalu.Kad bih ovako sve komisije radile u svim drugim stvarima vjerovatno bi mi bili broj jedan u svemu.Ja im

čestitam i nadam se da će i u narednom periodu Komisija nastaviti raditi u interesu građana. Većinom građani podnose zahtjeve i oni veoma brzo reaguju, izlaze na teren, završe svoj dio posla i nemamo nikakvih primjedbi od građana za rad ove komisije. Ja vam čestitam“.

Izvještaj o izvršenim procjenama prometa nepokretnosti i prava za 2017. godinu je usvojen jednoglasno.

TAČKA 7

IZVJEŠTAJ O IZVRŠENIM MJERENJIMA ZADOVOLJSTVA GRAĐANA JAVNIM USLUGAMA I RADU OPĆINSKOG VIJEĆA.

Nije bilo učesnika u diskusiji i Izvještaj o izvršenim mjerama je usvojen jednoglasno.

TAČKA 8

INICIJATIVA KOORDINACIJE BORAČKIH UDRUŽENJA OPĆINE GRAČANICA ZA IZMJENU ODLUKE O UTVRĐIVANJU ZNAČAJNIH DATUMA NA NIVOU OPĆINE GRAČANICA.

Učesnici u diskusiji po ovoj tački dnevnog reda su:

Džemal Jukan:

„Evo malo relaksacije, predsjednik komisije reče za sijalice, BPS pali sijalice, svjetla jeli. Dobro, Evo mi imamo inicijativu, ovdje kaže koordinacija boračkih organizacija. Vidim na žalost da ih nema u sali, a bili su, njihova tačka je na dnevnom redu i volio bih da jesu tu, jer reći ću neke stvari pa da to čuju. Ovo koordinacija, koje je to tijelo? To vjerovatno predsjednici ovih udruženja, izdogaaraju nešto, koordiniraju. Treba ipak legitimitet, ko to predlaže? Jeli to Udruženje registrovano, ustanova ili šta je, ali uredu. Evo ovdje se pominju dva datuma, Organizacija porodica šehida i Ratni vojni invalidi su predložili datume i da to budu datumi od opštinskog značaja. Ja pitam, šta je sa danom Zlatnih ljiljana, šta je sa danom demobilisanih boraca? Ako već se ide u širinu u lepezu, onda treba tretirati sve to. Međutim, ova inicijativa je došla, na osnovu Odluke Kantonalnih udruženja ovih organizacija. I ja bih njih pitao da su ovdje, da nisu dobili ovaj prijedlog od kantonalnih udruženja, da li bi izašli sa ovom inicijativom i da li bi predlagali, da usvajamo? Odprilike, ja znam šta je motiv ovih organizacija sa kantonalnog nivoa. Vi ste vidjeli juče u parlamentu Federacije da je vanredna sjednica oko boračkih populacija, zakona oko boraca i jednostavno žele neki da svoje pozicije učvrste. Ovo stanje kakvo jest da se proba zabetonirati da ostane takvo. Ja evo sam pristalica da nam treba jedan borački zakon, da treba jedno boračko udruženje, da treba objaviti registar svih boraca, da treba riješiti boračka pitanja. Mislim da ovo kako je krenulo, nije put, ovo je jedan pokušaj sadašnje garniture da ostane tako kako jeste. Ja znajući situaciju na kantonu, mislim da znate svi, ova udruženja su sva promijenila svoje statute. Promijenila su u članovima gdje se govorilo da mogu biti najviše dva mandata uzastopno. sve je promijenjeno i oni su malte-ne doživotno. Ako pogledate ko su predsjednici udruženja, oni su već petanest godina gore, ne mijenjajući se. Neke su svoje dobro tu udomili i ako hoće dobrobit borcima i da rješavaju pitanje boraca, onda se to treba rješavati na drugi način. Hoću da kažem samo od koga je potekla inicijativa i da nije došlo odozgo vjerovatno to ne bi ni imali na dnevnom redu. Ja pozdravljam naše borce. Oni su oformili i preduzeće, organizuju se, bore se, rade i to je za svaku pohvalu. Međutim, znam predivna udruženja koji je i danas predsjednik, koji je bio predmet rasprava Komisija za korupciju, čiji mobitel je bio 800,00 KM mjesečno, koji se školovao od državnih para i tako dalje i tako dalje. I danas je on predsjednik. Žao mi je što ih nema, međutim neka ne ide ova inicijativa, ali mislim da em nisu svi zastupljeni i da motiv ov onih od kojih je krenuo, nije pravni, nego jednostavno pokušavaju zadržati status takav kakav jeste“.

Džebo Senahid:

„Evo ovako, neposredno pred ovu sjednicu Vijeća, mi nismo imali komisiju i nismo oko ovog raspravljali, međutim, ovo se pojavilo u decembru mjesecu i održali smo tad komisiju. Nismo usaglasili stav Komisije.zašto? Ovdje su kantonalne organizacije dostavile svojim organizacijama da organizuju dan, a nigdje nije obaveza, niko da Opštinsko vijeće porglasi dan.Ali evo oni su se s tim obratili i uputili Komisiji a komisija nije donijela zajednički stav i na kraju je rečeno da Komisija za propise i Statut će odlučivati o tome.Mi danas nemamo zaključak Komisije za rad s boračkim populacijama a nemamo ni zaključka Komisije za propise i Statut.Mislim da je ova procedura malo promašena, da je danas to došlo ovdje, a evo pojasnit će i sekretar Vijeća“.

Dženana Tukulj:

„Ovo je došlo tačno u decembru, odnosno došlo je prilikom izrade Programa rada Općinskog vijeća.Iako se sjećate, mi smo ovo dostavili i prilikom razmatranja Programa rada vijeća i razmatrala je Komisija za praćenje položaja boračkih populacija.S obzirom da nije usaglašen stav, da se prihvata ili ne prihvata i da bude uvrštena u Program rada izmjena odluke, prosljedili ste Komisiji za propise i Statut, obilježavanje značajnih događaja i ličnosti, da i oni ovo razmatraju.Oni su to razmatrali na svojoj sjednici u decembru i predložili da uđe u program rada Vijeća ova inicijativa i da se Općinsko vijeće izjasni o njoj i onda da krenemo u proceduru izmjene ove Odluke ako Vijeće uopšte prihvati ovu inicijativu kao inicijativu za izmjenu Odluke o značajnim datumima.Znači komisija za propise i Statut je to predložila i to je ušlo, a Općinsko vijeće na decembarskoj sjednici je ovo prihvatilo u Programu rada da danas raspravljamo.I jedna i druga Komisija su smatrali da Vijeće razmotri inicijativu da li uopće da se ide u izmjenu te Odluke.Ukoliko Opštinsko vijeće danas prihvati ovu inicijativu ide se u izmjenu Odluke.Kakva će ona biti to će na kraju pokazati nacrt, javna rasprava i na kraju prijedlog Odluke kad bude“.

Osman Sulejmanović:

„Mi imamo dan šehida i mislim da je ovo po meni suvišno.Drugi dan ramazanskog bajrama je Dan šehida i na području je čitave BiH. Ne vidim razlog i kako bi mi sad ubacili ovu inicijativu kao dan u opštinski praznik.To bi samo da se prebaci od prilike ovamo, a znamo kako obilježavamo i ove datume.Neka mi oprostite ali da se pogledamo u oči od nas vijećnika, ko dođe na obilježavanje.Prvog marta, Dana brigade, datuma koji su već u opštinskoj odluci u obilježavanju.Ja mislim što se tiče inicijative za Dan šehida treba odbiti jer imamo Dan šehida drugi dan Bajrama“.

Općinski načelnik Nusret Helić:

„Ja sam na fonu, ovo Džemal što je govorio. Ljudi hajmo biti realni, utvrđivanje značajnih datuma na nivou općine.I mi sad hoćemo da utvrdimo posebno, neki Dan šehida čime će se doći u nekakav indirektni sukob sa Islamskom zajednicom, jer se dan šehida tačno obilježava drugog dana Bajrama.Dan RVI-a, de mi recite kako ćemo mi to obilježiti.Ovo je dobro da su udruženja, da oni obilježe a mi ćemo pomoći.Nije to Opštinski nikakav praznik.Imamo Dan brigade u odluci.U brigadi su bili i invalidi i oni koji su dali živote.dan odbrane, sve obilježimo tu.I to je datum značajan za Gračanicu kad smo odbranili i u kojem su učestvovali i oni koji su dali živote, oni koji su ostali bez dijelova tijela i preživjeli.Ja sam juče diskutovao na klubu, evo recite mi, šta ćemo mi to za dan RVI-a ručak platiti ljudima.Šta ćemo obilježavati? Unutar te kategorije ako im treba pomoć dat ćemo.nije to datum koji bi trebali obilježavati sa nivoa općine, vlasti, da tako kažem.Šta ako s epojavi pa neko traži Dan demobilisanih boraca ili Dan udruženja svih udruženja u Gračanici. Mi smo odredili Dan

općine zato što se tad u istoriji pojavila, Dan odbrane, evo prihvatili smo i Dan brigade, zato što je to gračanička, oslobodilačka i u njoj su sve kategorije. I mi sad trebamo dan RVI-a, sutra će Džuna reći i dan civilnih žrtava bude obilježen kao općinski. Mislim da nije dobro, tako to, a obilježiti ćemo ići ćemo i za Dan šehida idemo svi, svi mi se pojavimo tada iz svih kategorija. Za mene kad je u pitanju rat, ključno je Dan odbrane Gračanice, ima Dan brigade i to su oni koji su najviše dali i mislim da nebi trebalo prihvatiti inicijativu. Ima i drugih pozadina, kažu da s eovo radi sve zbog nekih para, da li učestvovati u raspodjeli para sa kantona. I to smo čuli, nemojte da je dovoljno što imamo u Odluci. Stvarno ne znam kako mi posebno da obilježimo Dan RVI-a. Stvarno ne znam“.

Edin Šehić:

„Ja bih se samo kratko nadovezao, s obzirom da sam i sudionik većinom ovih manifestacija, povodom obilježavanja, uvijek je Općina Gračanica, radila u koordinaciji sa ovim udruženjima. Uvijek su bila udruženja uvažena i učestvuju sklopu te organizacije obilježavanja. Takođe ću se nadovezati i na izjavu Osmana, trebamo se i mi uključiti i animirati ta boračka udruženja da što više članova dovode na to obilježavanje. Sve je skromno obilježeno, tako da i mi moramo animirati što više članova udruženja boračkih populacija da u što većem broju prisustvuju obilježavanju“.

Nihad Krajinović, Predsjedavajući Vijeća je dodao:

„Evo i radi javnosti, a vjerovatno će informacija otići i dalje, ove Odluke koje su došle iz saveza, ne obavezuju Vijeće, a mi ne sporimo da oni, udruženja, imaju svoje datume unutar organizacije. Ovdje i stoji da svaka Općinska organizacija odredi jedan datum u toku godine koji će se obilježiti kao Dan šehida u općini. Određene datume dostaviti u Savez. Dakle, nigdje se ne obavezuje Vijeće da utvrdi datum kao značajan za općinu, nego da organizacija na nivou svog rada to organizuje“.

Data je pauza u trajanju od petnaest minuta.

Nakon pauze Predsjedavajući Vijeća je definisao zaključak koji je utvrdio kolegij.

Općinsko vijeće Gračanica podržava da udruženja iz Koordinacije boračkih udruženja Općine Gračanica obilježavaju posebne datume:

- 20. Mart – Dane šehida i poginulih boraca općine Gračanica.
- 15. Juli „Dan ratnih vojnih invalida općine Gračanica“

uz napomenu da općina Gračanica, u skladu s mogućnostima budžeta Općine finansijski podrži obilježavanje ovih datuma.

Općinsko vijeće zadržava postojeći kalendar značajnih datuma Općine Gračanica.

Zaključak je usvojen jednoglasno.

Sjednica je završena u 14,15 sati.

ZAPISNIK VODILA:

Mevlida Naimkadić

**PREDSJEDAVAJUĆI
OPĆINSKOG VIJEĆA
Nihad Krajinović**

